

## Ek ( Daskixaf krafol )

Kotava sometir trakopafa ava, mancoba sometir jinafa rieta. Volson en tir erava vey « rietodafa » envara va tamava, batdume tir jinafa kiblara va « *apriori* » ava, dem tanuskaf trogarneem is pulviropaf omaveem voltikis va kona pilkovafa tuwavafa ava iku aveem.

Voxen bata rigotafa kiblara jupayad da va omaveem al undepé, i va omaveem baton rodres va kotak ke bolk nek dere banon ronijus plaxackaf is warzesackaf ta novera va direkefa towara is daniaskira va ezplekuyuna olegara oku awitisa.

Vanmiae kotaf rigotaf foopuleem nudaniaskickis va batyon uum remi favesa is towasa barsanda, darkaf bolk kan lizukaf yazeem is dere solara gu ugaf bolk is graykerdeleem tulapon tid. Milinde, ovopa ke otukaf bolk is malsavereem guyundenyer.

Luzdason, kottan rorabater da mukodafa ovopaca volasa va tamava is ponasaceem kotonon soguyundenyed ise va kona yaltapa batvieli somenedid. Abicote pinta ik zalera ik vonera belon sokartfid, volfigon.

Volson, konakviele, Kotava al nutir paaslensesa ta umafa vestara va lecakorafa rapta icde avopaxo ik trogarnxo numu katacera. Inafa kira ke « *apriori* » ava ilmimasa va kota rontifa turestaca iku remaykara male kona tuwavafa ava, tire sotir wavdaca esafa gu ranamera.

Undeson va bibera icde yoltara va winteem ke Awalt Bitejxo kare tanon kotavafa ovopa, al nué kase va tec lecaf volveybolk rozanudas va rotirafa daskixa mu yona gedrafa malsavera oku vuna vexala dem tenafa ota me co rogestat. Taneafa undera star da godostet da va otukaf bolk soguyundes is nijus plaxapaf is dere kimiskon rodivatcen ixam dadit. Voxe bat in gu 10<sup>e</sup> omava zo rigavayar.

Neken, konakara otukafa omava gan yone sane ta muxara va jontika ra isu pimtara kotugale zo uneyed. Tikison va mancoba, va jontika tula rigavayana gu 12<sup>e</sup> omava kakevet. Ostik, va konakman vierd wan unet : perdara va tanda gu san-toloy aksat, is va viel gu 12 ok 24 bartiv, ikz-.

Kaike batyona vieleafa tulapa, jontikar ind va mana pebusa teza vuested, i tulong jation kocadiepileropa is jontika ra ke trakopa ke Sinia ok Barata ikz- volkare vundakorafa vanburera. Arinde kalinon, konak ind ( opaf ok me ) krulded ise va tecyona jadifa mwa vey mesankorafa solokseropafa ovopa wetce nelkot sokaykad. Me gomalyedá kase batcoba tir testaca ok ageltacanya, ise loeke vol kalí da Kotava va int gu batmana ok banmana co gotentur, voxen va sina kan pilkaf rob ke ava is mebeituson va kon divuf trogarnaf vanbureks soe fiste rogotut ise romuxat, i va vanbureks mantode co kalavas va volmukodafa num rotaklena narara isu kotirkara.

Batdume coba cwe co tir ebokafa da Kotava va tec jonvodaf bolc di dadir, i va teca rilafa daskixa azon ronyana kare olegara milafa gu telyona vamoion pimtayana az rodimdafusa va envarafa sapuca. Kore bata daskixa abicote ok meote co zo saveter. Voxen inafa kruldera co ozeter da lente muxasa olegara akoydon me zo elekatat.

Kotafa bibera battode tir : va toka daskixa ? moe toka omava ? kan toka ovopa ? dem toka malsavesa joya ?

Va bat uum al undepé, is tulon va yona merontifa keska co ronokiesa va yoni bopi re faveni koe Kotava oku ra is dace rogribograsa. To va coba maltrakú, pakon, i va coba tire mepuskesa va kotak ke uum vox nufenkusa va yon kulackaf siak sedme jin :

- pulas bolc pendas va 4<sup>e</sup> omava is 8<sup>e</sup> omava is 12<sup>e</sup> omava is 24<sup>e</sup> omava, perdan gu aredjeem is vuestes va tanafa nia. Va bat bolc gu « *Daskixaf Krafol* » yoltá, reduson va « ek » antaf warzaravlemack, vamoion remgluyason gu « eka » kotavolk wetce taneodafe zae, is faveson va bata ewava vas krafol sotis kake kota batcoba is rokaikenvan gu stravok ke doca den konaka savera.

Xuyava al jupar da Kotava va abava dem tol-san-balemoy eltay dir ( mali sulara va H eltay ), nume nover da wetce omava rosavet. Batkane va krafol ( i va limega yaleston ovason ) dem 24 milsolumafa olya solpakesa kale divefa ok teniskafa kima rotenvat. Ede kare bolc ke ekakirafa otukara ovat, pune kota olya va gentim vas 15° fuxe tela direfa sodir ( eem vas 360° ).

Wavidon, kiblá da va A olya wetce tela taneodafa ticon vodjusa ( vane lenteka ) tentú, az va fis woyok tozuwes dum tel ke sutera, trabe talturonon, baskon gu trulaveel.

Kota olya vey abava numon zo yoltar aze va -oda radimostinda mbi loplekur :

- yolt ke eltay, inde dem -e tenaca todon gu rol re sotir, nijur kotunaf, solve savsafa vertuma dem -a tenaca va konaka argesa koboda tove trogarn ixam kruldes dene gubefa ava co daskiyir ;
- -oda radimostinda gundon gu tela ixam favena ta dasugdara va yona manafa conya dene darkasaberopa zo saver. Ison va gluya do miv « oda » ravlem dere rowit ;
- numen batcoba daskir va : aoda ( A olya vas 0/360° ) is beoda ( B olya vas 15° ) is ceoda ( C olya vas 30° ) ... is zeoda ( Z olya vas 345° ).

Kota aredja ( okon walolyaxo, okon ekki ) gu pendaks dem yolt ke kota toloya ninkesa olya is loplekuna gu -k radimostinda zo yoltar :

- olyapendara vey omava zo sopur : 1<sup>e</sup> olya + 2<sup>e</sup> olya ( tulon : 1<sup>e</sup> olya = A is 2<sup>e</sup> olya = B → « abe » ; 1<sup>e</sup> olya = K is 2<sup>e</sup> olya = L → « keke » ; ikz- ) ;
- -k radimostinda tir tela uneyena tori ravlem dum lok ok lek ok yolt ke lent ( lent[a]k, div[a]k, kev[a]k, ikz- ). Isen kiblara va « ek » ravlem wetce yolt kotonon dasugdas va bat krafolkoraf bolc va pokefa mamtuca dere firvir.

Acum, kare favena omava, di dadit :

Omava	Dalafa olya	Ekki
24 <sup>e</sup> omava	A ( aoda )	abek, becek, cedek, deek, efek, fegek, geik, ijek, jekek, kelek, lemek, menek, neok, opek, perek, resek, setek, teuk, uvek, vewek, wexek, xeyek, yezak, zeak
12 <sup>e</sup> omava	A ( aoda )	acek, ceek, egek, gejek, jelek, lenek, nepek, pesek, seuk, uvek, weyek, yeak
8 <sup>e</sup> omava	A ( aoda )	adek, degek, gekek, kenek, nerek, reuk, ukek, xeak
6 <sup>e</sup> omava	A ( aoda )	aek, ejek, jenek, nesek, sewek, weak
4 <sup>e</sup> omava	A ( aoda )	agek, genek, neuk, uak
2 <sup>e</sup> omava	A ( aoda )	anek, neak
2 <sup>e</sup> omava	U ( uoda )	ugek, geuk

Ede vey omava lefa dam tela 24<sup>e</sup> ovat, pune va dalafa olya dere robotat ise va dalafa lya ropastat. Mantode yolt ke ekki volvokon zo rozaleter. Batinde, ede gestat da dene 4<sup>e</sup> omava dem D olya wetce daluca tigit, pune wetce ekki di seotat :

– [dekek](#), [kerek](#), [rexek](#), [xedek](#).



4) Tawavopafa muxara :

agek = lentronefa balemeaca

van deoda = lentrnon

5) Darkasaberopafa muxara :

aaakaf gentim = kotraf gentim ( $360^\circ$ )

aneakaf gentim = azef gentim ( $180^\circ$ )

agekaf gentim = rontaf gentim ( $90^\circ$ )

Firenze, ba 15/01/2017